

Ucapan YAB Perdana Menteri, Tun Haji Abdul Razak bin Hussein,
di pembukaan Kilang Nenas Kedua, Syarikat Kilang Nenas Tanah Melayu,
pada 16hb April 1972, jam 3.30 petang, di Pulau Sebatang, Johor.

Saya sungguh gembira setiap kali saya berpeluang merasmikan pembukaan sebuah kilang perusahaan, kerana ibarat orang yang sedang mendirikan rumah, terdirinya sebuah kilang baru bermakna kita maju setapak lagi ke hadapan dalam usaha membangun ekonomi negara untuk kesejahteraan dan kemakmuran rakyat.

Baru kelmarin saya diberi penghormatan membuka sebuah Brewery di Shah Alam iaitu usaha bersama syarikat asing dengan pemodal Malaysia. Hari ini kegembiraan saya agak lebih istimewa daripada yang sudah-sudah kerana Kilang Pengetin Nenas ini adalah suatu projek yang hampir di hati saya dan membawa makna yang besar kepada rakyat di Pontian ini.

Saya amat terharu dengan sambutan meriah yang diberikan kepada saya dan rombongan sebentar tadi dan inginlah saya menyatakan ucapan terima kasih kepada semua mereka yang turut serta menyelenggarakan sambutan tadi.

Sebagaimana maalam, Syarikat Kilang Nenas Tanah Melayu (atau PCM) ini adalah di modali sepenuhnya oleh Kerajaan dan sudah tentulah sekali Kerajaan mengambil berat akan maju mundurnya kilang ini. Dalam contex pembangunan negara, terutama Dasar Ekonomi Baru Kerajaan, perusahaan ini tidaklah dipandang semata-mata dari segi untung atau ruginya. Malahan, lebih jauh daripada itu. Kilang ini merupakan satu experiment yang julung kali dijalankan serta bukti yang Kerajaan sanggup melibatkan diri secara langsung dalam perindustrian di kawasan luar bandar, di mana hasil pertanian rakyat merupakan bahan mentah yang utama untuk di peroses sama ada nenas atau lain-lain lagi.

Pelaksanaan Dasar Ekonomi Baru adalah satu commitment yang mesti dijayakan, kerana mengingat di kawasan luar bandar terdapat bukan sahaja tekanan penganggoran yang mendesak tetapi juga saluran2 pemasaran hasil mahsul masih belum terator dengan sempurna. Saya ingin memberi jaminan bahawa Kerajaan akan terus menjalankan segala daya usaha supaya segala langkah dan usaha yang dijalankan itu mencapai sepenuh-penuh kejayaan.

Dalam hubungan ini Kerajaan telah menubuhkan berbagai2 badan seperti Lembaga Pemasaran Pertanian (FAMA); Institut Penyelidikan Pertanian (MARDI); Lembaga Padi dan Beras Negara; Institut Kaji-teknik Makanan dan tidak berapa lama dulu dilancarkan Syarikat Perusahaan2 Makanan (FIMA). Badan2 ini, sebagai agensi pembangunan negara, mempunyai peranan-nya masing2 tetapi dengan tujuan2 asasi yang sama, iaitu hendak meningkatkan kemajuan sektor pertanian dalam artikata yang sapenoh-nya. Dengan adanya penyelarasan yang rapi, saya percaya hasil2 kerja dan penyelidikan badan2 tadi akan mendatangkan sapenoh2 faedah kepada kaum petani khusus-nya dan kepada sektor perusahaan pertanian negara 'am-nya.

Saudara2 sekalian.

Kita bershukor kepada Allah yang menjadikan bumi kita ini kaya dan subur dengan berbagai jenis tanaman. Maka sebab itulah dari sejak zaman berzaman pertanian menjadi mata pencarian sebahagian terbesar daripada rakyat kita, ia-itu kaum Bumiputera. Akan tetapi, oleh kerana kepentingan ekonomi penjajah yang berkuasa pada masa dahulu, hanya sektor pertanian yang tertentu sahaja diberi perhatian iaitu ladang2 getah dan kelapa sawit milek asing sedangkan bahagian2 yang lain, tegasnya, kawasan2 Melayu yang bergantung kepada padi dan buah2an, tidak begitu dihiraukan. Sekarang dengan adanya rancangan2 yang tegas dan berkesan, kita telah maju jauh dalam pengeluaran padi dan beras sehingga hampir ke had

kita tidak perlu lagi mengimpor beras dari luar negeri.

Tetapi nampak bidang pengeluaran buah-buahan masih ketinggalan. Di bidang inilah, saya rasa, para penyelidik dan perancang pertanian kita perlu melipatgandakan usaha supaya buah-buahan tempatan kita bukan saja diperbaiki kualitasnya bahkan pengeluarannya hendaklah dibuat cara besar-besaran untuk pasaran dan industri. Kempen menggalakkan makan buah-buahan tempatan, saya percaya, tentulah akan lebih berjaya dan berkesan sekiranya buah-buahan mudah diperolehi dan juga bermutu dengan harga yang tidak berapa tinggi. Saya telah mengarahkan FAMA supaya dari semasa ke semasa kempen seperti itu hendaklah dinilai untuk mengukir sejauh mana kita telah berjaya.

Bagaimanapun, yang lebih penting hari ini ialah supaya perusahaan menanam buah-buahan dapat dimajukan dengan lebih pesat dan teratur. Untuk memenuhi keperluan buah-buahan dijadikan bahan industri, ada baiknya kalau diadakan kawasan-pilihan bagi mengeluarkan jenis buah-buahan tertentu. Kita semua tahu di kawasan Pontian/Johor ini, disebabkan tanahnya gambut atau peaty soil merupakan kawasan bertanam nenas yang jaya dimana terdapat beberapa buah kilang memproses nenas termasuk kilang baru PCM ini. Saya difahamkan FAMA yang menjadi Syarikat Indok kepada PCM, dengan kerjasama Kerajaan negeri akan membuka kawasan yang sesuai di Selangor dan lain-lain negeri ladang nenas dan mendirikan perusahaan memproses selanjutnya.

Rancangan yang tersusun, meliputi lain-lain jenis buah-buahan akan membukakan lapangan yang lebih luas kepada pengusaha sama ada FAMA atau pihak swasta di samping memberi peluang pekerjaan kepada rakyat luar bandar. Oleh itu mustahaklah perusahaan bertanam buah-buahan ini di kaji secara mendalam, baik dari segi penghasilannya mahu pun tentang penggunaannya. Barangkali elok juga ditinjau penggalakan menanam semula buah-buahan yang sekarang dibuat secara sampingan menerusi Rancangan Tanam Semula Getah, boleh diubah supaya menjadi rancangan secara langsung yang teratur. Setakat ini, selain dari getah memang sudah ada beberapa badan khas untuk memajukan tanaman tertentu seperti kelapa, nenas dan koko. Perusahaan bertanam nenas, umpamanya, diletakkan di bawah Lembaga Perusahaan Nenas Tanah Melayu atau MPIB, dan saya ingin melihat Lembaga ini berjalan pesat terutama di Johor ini.

Saudara-saudara sekalian.

Berkenaan dengan Syarikat Kilang Nenas ini, saya berpuas hati dengan perjalanannya dan juga kemajuannya. Semenjak ditubuhkan lapan tahun yang lalu, Kilang ini telah dapat memenuhi hasrat yang mendorong penubuhannya iaitu menampung nenas yang ditanam oleh pekebun kecil dan memberi peluang pekerjaan. Ini dengan sendirinya merupakan bukti kecekapan, kejujuran dan dedikasi pegawai-pegawai dan pekerja Kilang ini. Pembukaan Kilang kedua ini menandakan satu langkah kemajuan lagi dalam memenuhi tugas dan kewajipannya.

Saya suka mengambil kesempatan ini mengucapkan tahniah kepada penduduk di Pulau Sebatang ini dan di kawasan sekitarnya kerana bukan saja mereka sekarang mendapat sebuah Kilang yang akan menampung pengeluaran nenas di sini, tetapi juga kerana inilah kilang besar yang pertama, berharga berjuta-juta ringgit, yang dibuka dibawah Dasar Ekonomi Baru Kerajaan hendak membawa industri ke kawasan luar bandar.

Sebagai pihak yang akan menerima menafa'at daripada projek ini, mereka juga mempunyai tanggungjawab untuk memastikan supaya Kilang ini terus maju mencapai tujuannya. Kilang ini, sungguhpun di modal sepenuhnya oleh Kerajaan, adalah sebenarnya sebuah Syarikat Perniagaan. Perjalanannya dan pengurusannya mengikut lunas perniagaan yang lazim dan dengan sebab itu mestilah sedikit sebanyak menunjukkan keuntungan.

Oleh yang demikian, saudara2 juga hendaklah memandangnya tidak ubah seperti badan perniagaan lain. Malahan, sebagai hak Kerajaan, kilang ini adalah hak ra'ayat iaitu hak saudara2 juga. Maka itu adalah lebeh2 wajar dan mustahak kita jaga bersama2 dengan baik supaya jenteranya sentiasa berjalan lancar dan licin setiap masa. Sebarang kemajuan yang diperolehi tentulah akan berbalek faedahnya kepada saudara2 sendiri juga, lebeh2 pula kerana hasil pengeluaran Kilang ini mencerminkan imej negara kita di luar negeri.

Saudara2 sekalian.

Dalam hubungan ini saya harap pekebun2 kecil nenas dikawasan Pontian ini dan juga di tempat2 lain, hendaklah berusaha menanam serta menghasilkan nenas yang bermutu tinggi untuk membekalkan Kilang ini. Kebun2 lama eloklah di tanam semula dengan jenis yang baik. Dengan demikian, saudara2 bukan sahaja memperoleh pendapatan yang tinggi tetapi Kilang baru kita ini akan dapat pula mengekalkan mutu pengeluarannya satanding dengan yang terbaik di dunia.

Saya menegaskan hal ini kerana mengingat tidak lama lagi kita akan menghadapi persaingan yang hebat di pasaran Eropah berikutan dengan kemasukan Britain ke dalam EEC dan juga di pasaran dunia. Peri mustahaknya kita mengawal dan mengekalkan mutu hasil-hasil pertanian sama ada getah, minyak kelapa sawit, nenas dan sebagainya adalah perkara yang patut di ambil berat oleh semua pihak. Kerajaan sedia memperuntukkan wang yang banyak untuk penyelidikan atau research pada semua peringkat supaya bidang perindustrian kita benar-benar mendapat menafaat dari kemajuan sains dan teknologi.

Pada hemat saya, masa depan untuk perusahaan memproses buah2an dan makanan sungguh cerah apabila MARDI dan Institute Kajiteknik Makanan meningkatkan usaha2 penyelidikan mereka di bidang masing2. Kawasan2 baru yang akan dibuka secara besar2an di Pahang, Trengganu dan Johor akan menghasilkan tanaman2 baru di samping penternakan. Ini berma'ana kita akan mengubah corak menjelma dari sabuah negara pengimpot barang2 makanan saperti gula, susu, daging dan lain2 rnenjadi negara yang betul2 berdikari bahkan boleh mengekspot barang2 itu.

Saya tidak juga lupa mengucapkan terima kasih kepada Kerajaan Johor di bawah pimpinan Dato Haji Othman yang sentiasa memberikan kerjasama dan pertolongan dalam menubuhkan kilang kedua ini.

Akhir kata, saya sekali lagi menggesa PCM supaya terus mengekalkan daya usaha dan menjayakan kilang ini menurut cara perusahaan yang tertentu, serta menunjukkan jalan kepada Kilang2 lain yang akan muncul kelak.

Dengan ini saya sukacita merasmikan pembukaan Kilang Kedua PCM Pulai Sebatang ini.



Gambar ini menunjukkan keriangannya Tun Abdul Razak selepas diberi tahu oleh Ketua Pengarah LPP, Encik Ahmad Sarji bin Abdul Hamid mengenai cadangan hendak membina Wisma Peladang.